

ARLEF: SI INVIE IL PROGETTO FORMATIF EUROPEAN RUSH

Coinvolts, sore che il Friûl-Vignesie Julie, ancje la Galizie (Spagne) e la Cravuzie. Un finanziament di 186 mil euros (unic projet finanziât in regjon) pe formazion plurilingâl, cun atenzion particolâr aes lenghis di minorance

Al cjararà inviament intai dîs che a vegnin **il projet internazionâl di Erasmus+ clamât *Rush*, li che la ARLeF (Agenzie Regjonâl pe Lenghe Furlane) e à lavorât a fuart te fase di presentazion de candidature.** La Comunitât europeane e à ricognossût la valence culturâl impuartante dal projet assegnant un finanziament di 186 mil euros: **unic dal gjenar finanziât in regjon, chest an. Il projet, di durade trienâl, al è impuartant inte suaze des buinis praticis pal insegnament des lenghis minoritariis e al cjape dentri, pe prime volte: Italie (Friûl-Vignesie Julie), Spagne (Galizie) e Cravuzie.** Di là de ARLeF, a *Rush* a partecipin l'Istitût Omnicomprensîf Convit Nazionâl "Paolo Diacono" di Cividât che al è a cjâf dal projet; il Comun di Cividât (citât de Unesco); lis dôs scuelis galizianis Salvaterra di Miño e Carlos Caseras, in colaborazion cu la Dirección Xeral di Educación; la scuele Benussi di Rovigno e la Unione Italiana in Slovenia e Croazia. Tal compless, a saran centenârs i students coinvolt e desenis i insegnants.

«O vin cjapade cun grande sodisfazion la buine notizie relative al finanziament dal nestri projet intal ambit di Erasmus+ - al declare il president dal ARLeF Lorenzo Fabbro -. Dal sigûr lis ativitâts che a vignaran disvilupadis cun *Rush* a contribuiran a meti dongje e a insiorâ, traviers scambis e contribûts di altris regjons di Europe, ce che si è daûr a fâ par rinfuarçâ competencis, formazion dai docents e ancje modalitâts modernis di aprendiment des lenghis – sigûr ancje dal furlan - intes scuelis dal nestri teritori».

«La impuartance di chest projet e je inte inovazion dal inseriment des lenghis minoritariis intal insegnament plurilinguistic – e dîs Patrizia Pavatti, retôr e dirigjent scolastic dal Convit Nazionâl Paolo Diacono, che al è a cjâf di *Rush* -. Chest si sperimente pe prime volte in Europe e al da al projet stes une dimension plui largje e pionieristiche par costruî une pratiche educative di sucès e trasferibile».

Il program Erasmus+ al è dedicât ae istruzion, formazion, zoventût e sport. In cheste suaze *Rush* al vûl contribuî a definî i titui culturâi, professionâi e scientifics ricognossûts al docent plurilingâl in Europe e a creâ moduli formatifs trasversâi aes competencis clâf, traviers l'aprendiment integrât di lenghe e di contignût cuntun ûs plui larc des tecnologjiis de informazion e de comunicazion intes scuelis cun arlêfs tra i 3 e i 14 agns, par modernizâ i ambits di aprendiment.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
 Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

Ducj i ents participants al progjet a son, di agns, impegnâts inte difese des lenghis minoritariis, intal infuartiment de identitât des comunitâts locâls e intal creâ vincui tra citadins di Paîs diviers che, inte varietât culturâl e linguistiche a cjatin elements par promovi i ideâi di citadinance europeane. In particolâr, il progjet al smire: a rinfuarçâ il nivel professionâl dai docents, sedi in prime formazion che in servizi par aumentâ la cualitât dal insegnament traviers gnûfs metodis e struments; a disvilupâ un sens di citadinance ative e cussiente, intune dimension europeane inclusive e interculturâl pes competencis sociâls e civichis; a favorî il scambi e il confront tra docents di diviers paîs su obietîfs comuns e di costruzion di une comunitât di pratiche professionâl europeane; a butâ jù i ostacui di distinzion, discriminazion, escluson, segregazion e discriminazion inte istruzion e a inçressi lis oportunitâts ocupazionâls stant che lis competencis dal plurilinguism a son calcoladis tant che un element clâf a nivel european.

E je previodude ancje la creazion di un Centri risorsis di documentazion pe autoformazion dai docents e su la modernizazion dai sistemis di insegnament/aprendiment in dimension europeane.

Udin, ai 27 di Otubar dal 2017

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<